

վրայ եւ, խոր, անդնդային, չափ հեռուից եւ կողմի ձայնով՝ արտասանեց.

— Մեռել ա...

Ոչինչ չպատասխանեցի:

Ոչինչ չկարողացայ պատասխանել: Կան վայրկեաններ, երբ մարդ բնազդաբար կանգ է առնում անորոշի տատանուող մի վարագոյրի առջեւ: Ետեւը՝ մութ մի բեմ է, ուր անսպասելի գործողութեան հերոսները յանկարծ գլուխ են բարձրացնում եւ սկսում են շարժուել: Ու չպատասխանեցի նաեւ նրա համար, որովհետեւ մահը՝ ամէն մարդու մահը՝ անակնկալ կեանքի նոր պատրանքներ է ստեղծում, վերջին վայրկեանին ցցւում է ամբողջ իր ուժով, համադրական մեծ ժեստ է անում, լուսաւորում է, գիւցաղներգական հերոսի նման ահաւոր թուր է բարձրացնում եւ, ընդմիջտ անհետանալուց առաջ, հարուածում է:

— Մեռել ա, — կրկնեց անծանօթը, — հասկանո՞ւմ էք, Լենինը մեռել ա...

— Ծխո՞ւմ էք, — ու առջեւը գլանիկների տուփը դրի:

Մարդը ծխեց եւ, երկար մտածելուց յետոյ, կարծես խոր մի երազից արթնանալով, արտասանեց.

— Իլիչը մեռել ա... Տաժանելի մի աստուած էր...

Ժպտացի:

— Զեր ժպիտը անտեղի է: Եւ ինչո՞ւ Իլիչը չալիտի կարողանար լինել մի աստուած: Ոչ այն բացարձակ Ուժը, որին կարելի է դուք հաւատում էք, այլ այն յարաբերական խորհրդանշանները, որոնց նոր առաքելայինը հերքում են յանուն Լենինի: Յիշո՞ւմ էք Վօլգերի այն պատմութեանը...

— Ո՞րը:

— Մի օր խլուրդի եւ ծղրիտի բնակատեղիների վրայից արօրի խփ անցաւ: Երբ ծղրիտը տեսաւ, որ մեծ որջը, ուր նա պատրաստուած էր, փայլուն երկաթի տակ տակնուվրայ է եղել, բացականչեց. «Այդ աւերը հրակայ մի ծղրիտի գործն է»: «Ի՞նչ ես ասում, — պատասխանեց չլացած խլուրդը, — ծղրիտի գործը՝ երբե՛ք. դա հսկայ մի խլուրդի գործն է»:

— Ամէն մարդ ստեղծում է իր աստուա-

ծը՝ ըստ իր պատկերի: Վերջիչեցէք աստուածների թափօրը՝ դարերի շարանի մէջ ընթացող: Ի՞նչ հոյակապ անցք՝ կայծակնահար ու գլորդալից հեռանկարի մէջ: Մտածեցէ՛ք մի վայրկեան փոթորկալից, պատռտուած այն երկնքների մասին, ուր նրանք ապրած ու դործած են: Որոտընդոտ ձայները ամպերի մէջ, ահաւոր կռիւները ալեկոծ ծովերի ափերին, շանթանման սուրերի բախումը, անսիրտ սպանութիւնները, ահաւոր ոճիրները... Ահաւասիկ, բոցավառ Սինայի գլխին, մօրուքաւոր աստուծոյ աղաղակը եւ զինուորական փողերի անվերջանալի ձայնը: Ահաւասիկ, յունաց աշխարհի Զեւսը, որի վառվռուն նայուածքին առջեւ Ողիմպոսը դողում է: Ահաւասիկ՝ հազար ուրիշներ... ոմանք բարի եւ երազիւուն, որոնց մատերի տակ բնութիւնը քաղցր քնարերգում է, ոմանք խորասուզուած խորհրդաւոր մտքերի մէջ, եւ ոմանք էլ ողբերգութեան դիմակի տակ թաքնուած...

— Աստուածներ, աստուածներ... Պատմութեան ամէն մի անկիւնից մի աստուած է դուրս գալիս: Գալիս է, կանգ է առնում մարդկանց էութեան մէջ եւ գոյացման իր ձեւն է որոնում: Յաճախ նա ներկայանում է մարդկային կերպարանքով, երբեմն ահաւոր կենդանիի պատկերի է վերածւում, իսկ երբեմն էլ դառնում է վերացական, անմարմին մի գաղտնիք՝ փիլիսոփաների թաքնաթաղուր խորհրի կենտրոնում ծնւած: Ի՞նչ տարօրինակ յեղաշրջումներ... Անաքսիմէնի հետ նա օդ է, որ ամէն մի վայրկեան շնչում ենք, իսկ Անաքսիմանդը ճիգ է անում ապացուցանելու, որ աստուածները մեռնում են եւ վերածնւում: Պարմենիդը նրանց վեր է ածում լուսաւոր չրջանի, որով սնանում է աշխարհը, մինչ էմպեդոկլը, փառաւոր այդ բանաստեղծը եւ իր ժամանակի ծայրայեղ յեղափոխականը, բնութեան չորս տարրերի մէջ աւառնող աստուածներ է նշմարում: Իսկ Քսենոֆանը, բարեկամ, Քսենոֆանը կարծում էր, հաւատում էր, որ նա կոյր է, տեսնում է եւ լսում, բայց չէ շնչում: Մի աստուած, որ չի շնչում, երեւակայեցէք...

— Կայ նաեւ փիթագորի գեղեցիկ պարազան՝ թիւերը: Թիւե՛րը աստղերի պարը, խոր-